



Nairs in sia segunda stagiun extra muros

Quista stà vain tematisà l'art e la mansteranza i'l spejel da la cuntrada

Il stabilimaint da Nairs a Scuol vain actualmaing restructuri per pudair partir la mittà dal 2016 cun ün concezt da gestiun annual. Uschè Nairs giouva ün'ulteriura stà i'ls cumüns.

JON DUSCHLETTA

Il center d'art contemporanea Nairs ha gronds intents. A partir da la stà 2016 dess la gestiun, limitada hoz süls mais da stà, gnir extaisa sün l'on inter. Perquai vain lavurà daspö duos ons vi dal stabilimaint da bogn istoric chi'd es suot protecziun da monumaints. Suot la bachetta dal manader artistic, Christof Rösch, less il center Nairs implü schlargiar sia sporta existenta da center da cultura ed eir seis program internaziunal «d'artists in residence», AIR. Cun üna nouva sala d'arrandschamaints ed ün center per dialog intercultural (CID) vögljan ils respunsabels garantir lur portada eir i'l avegnir. Quista visiun «Nairs futur» ed eir il nouv concezt da gestiun sun stats sustgnüts da la Fundaziun per innovaziun, svilup e perscrutaziun Grischun. Eir grazcha al sustegn regiunal - fin uossa han contribui ils cumüns da Scuol e contuorns e la Corporaziun Energia Engiadina (CEE) 439'000 francs - speran ils respunsabels

da pudair accumpilir eir la finanziaziun restanta. Tenor üna comunicaziun da medias dal center Nairs, sun sgürats actualmaing 91 pertschient dals cuosts totals da fabrica da 3.75 milliuns francs.

Art, mansteranza e cuntrada

Percepir, identifichar, far visibel ed interpretar nouv. Quai sun ils stizzis sün quals il program da stà da Nairs as fuonda. Darcheu vegnan dischlochats ils singuls arrandschamaints ils cumüns, illas scoulas, ils tablats o simplamaing illa cuntrada da l'Engiadina Bassa. Concretamaing tematisescha Nairs «la valor dal manster» sco part da l'ierta immateriala, ed eir ils materials da la cultura da fabrica, crap, chaltschina, metal e lain chi fuorman l'ierta materiala.

Sur tuot la stagiun ha lö a Nairs svesa ün concuors da disegn e pittüra. Suot il titel «Denk mal nach? - Lernort Denkmal» pon interessats s-chaffir ouvas chi vegnan valütadas d'utuon ed expostas in november a Scuol. La fin d'eivna dals 22 e 23 avuost ha lö la gronda festa tradiziunala da stà «Nukleus Nairs» cun diversas acziuns dals artists. Tanter oter installescha l'architect Men-Duri Arquint dad Ardez ün'intervenziun da glüm illa Büvetta. Quist «memorial» dess restar in funcziun fin pro quel di, cur cha vain realisada la sgürada dal grip chi periclitescha la Büvetta.

Lampert, Wetzel e Müller

Il program da stà da Nairs es ourdvard vast. El prevezza tanter oter l'exposiziun «Wild» dal artist Michael Günzburger illa Chasa Piz Tschütta a Vnà, il toc da teater «Grossvater und die Wölfe» da Per Olov Enquist e giovà da Clo Bisaz opür «Uorsin reloaded», üna sairada insolita da jazz per amis dad Uorsin.

La spassegiada d'architectura annuala cun Köbi Gantenbein, Magda Vogel e John Wolf Brennan maina quist on, in tschercha da «baselgias, tuns e pleds», illas baselgias da Tschlin e Vnà. Part integrala dal program da stà sun trais lavuratori da mincha jada ün di dürada cul titel: «Cuntrada e mansteranza.» Il lavuratori «fier» vain manà dal farrer Thomas Lampert da Garsun als 18 lügl, quel da «chaltschina» dal müraeder e chalcher Joannes Wetzel als 25 lügl a Sent e quel da «lain» dal falegnam Curdin Müller da Strada als 5 settember a S-clamischot.

Implü prevezza il program da Nairs ün'excursiun illas chavas da marmel a Laas ed eir ün'excursiun illa Val Bregaglia chi'd es gnüda onurada be d'incuort cul premi Wakker. L'architect indigen da Soglio, Armando Ruinelli, maina là tras cumüns e cuntrada.

Il program da stà detaglià ed ulteriuras infuormaziuns suot: www.nairs.ch